

## **Polo Kolosi Firampor Kumwimp Pas Mekia Akwapnámp Kar**

Jisaso pok tenánko, 32 yopwar niamp arake fek, Polo Rom mek kalabus mek yakria Kolosi mekamp siosompor kumwia Tikikus ntia Onesimusomp yaek sámp-kérép námpon. Ankwap pas te Filemonompor méntér sámp-kérép námpon.

Wokwaek te Polo Efesus mek Kwapwe Kare Kar farákápámp ke fek, taun Kolosi wonae fik tae morok yak námpara, mao Epafrasén sámp-kérép nánko, mao Kolosi mek akwapea Kwapwe Kare Kar farákápámpon.

Aempan maok, wakmwaek Epafras nke nánko, arop ankwap fákáre Kolosi mekamp siosomp Kwarén mérnáp sámpá yampourou napantá, Polo am fárákapamp ninik mek kárákáre sánkria mámá pas kumwimpon.

Tá Polo ankwap kar arakrá sér: Kwaro Jisasomp yae kor fek kápae kare ankank yoroimpon. Kwaro Jisasén sámp-kérépámp te, kápae kare ankank Kwaronámpok tia koupoukour naenámpria ninámpon.

<sup>1-2</sup> Taun Kolosi mek yakápnáp sios kouramteouráp arop e! Ono Pol onan Kwaro aposel yakaerianánko, ono Krai Jisasomp aposel yak nampon. Ono nomp ankwapnámp Timotint yumo Kraisen mér nap kárákáre fek yakáp nap, yiráp por má

pas kumwi re. Yinomp ninik te nomp Naropwar Kwaro námokuráp ninik fek yumwan yae-wour nánko, yumo yonkwae porokwe fek yakáp mwanapria nampon.

*Kolosi mekamp arop fárákapao Jisasén mér kare-  
nap kar*

<sup>3</sup> Yino yumwan ninikia Kwarén sénemp fek yino te ankár nomp Jisas Krais Tokwaeramp Naropwar Kwarén ‘Aesio’rá sér saráp yak konempon.

✧ <sup>4-6</sup> Am te apae riteanápe, yumo wokwae kar Kwaromp Kwapwe Kare Kar wawia méria, Kwaro yiráp por yámar mek nánapia pátenámp ankankantá yépékrá yakápnep kar te yino wae wawi nempon. Aenempara, yumo te ankár Krais Jisasén mérria maok, am fek Kwaromp arop fákáreran kor ponankor warákárrá nouroup napon. Yumonkir Kwaromp Kwapwe Kare Kar korop námp wawia, Kwar námokuráp ninik fek aropomp i konámp nkea mériaka, yae-párak kare paokop napo, am Kwapwe Kare Kar támao ankár apár-apár mek kor tokwae yak nánko, yumon-apnámp taknámp arop ponankor ankár kwapwe kare ninik fek yakáp napon. ✧ <sup>7</sup> Epafras te yino énéni tére konámpara, yumwan am Kwapwe Kare Kar akwapá farákáp námp te, yino man warákár konempon. Mao te yumwan yaewourrá Kraisomp téreran yae-párak kare tére konámpon. <sup>8</sup> Mao koropeaka ‘Yumo Kwaromp kounteouráp aropan nouroup kare nap te, Yiki Kor Spiritao yiráp ninik mek kékéménk nánko naponó’rá yinan séri námpon.

---

✧ **1:3:** Ef 6:18 ✧ **1:4-6:** Ef 1:13,15; 1 Pi 1:3-4

*Polo Kolosi mekamp arop fákáreran Kwaro kárákáre sánkanoria kar toropwapimp kar*

<sup>9</sup> Am kar yino kor wawia maok, yino am yae feknámpia yumwan yaewourrá kar toropwapi nempon. Kwaro yumwan yaewouranoriaka Kwarén sér i konempara, yumo te Kwaro yumwan kar sénámp wawia mántwaok mwanapon. Aenapo maok, Yiki Kor Spiritao yumwan nkwakwe make mér kwapwe ntia ninik kwapwe sánk nángo maok, yiráp ninik mek tokwae kari yak naenámpon.

<sup>10</sup> Aenángo maok, yumo fwap Kristen kare paokop mwanap pwi kari yakria maok, yumo fwap Kwaro warákárnámp ninikaok paokop mwanapon. Takria maok, arop aropompria yaewourrá nkwakwe make tére kwapwe napo, yumo Kwarén mérnáp ninikao kor akwapea tokwae kari yak naenámpon. ☆ <sup>11</sup> Yinomp ninik te, Kwaromp kárákáre tokwaerao yiráp ninik mek tokwae kari yak nángo, nkwakwe make ankank kwatae korop námpan kor, yumo kokwae mo, fwap kárákáre fek yakápria maok, am táman kor mént warákárria <sup>12-14</sup> Naropwar Kwarén ‘Aesio’rá sér mwanapon. Mao te Satanomp kirikipao nomwan sámp-fákeyak námp mekamp éréképriaka, náráp Táráp kwapwe karerént yakápnáp arop fákárerént tapokwapá pwarari námpon. Aenángo maok, Kwaromp Tárápao nomwan yamokwapeaka nomp kwatae ninik ník mo pwarareanánko, nomo amwar yae-párák kare yakáp námpon. Kwar te yumwan fwapokwapia, yumo am wae kwapwe fek yakápnáp arop fárákapént sámp mwanapria

---

☆ **1:10:** Ef 2:10; Fl 1:27

ankank kwapwe kare yiráp por nánapia páte námp sámp mwanap pwi napon. ☆

*Kraisomp ninik ntia maomp térean sénámp kar*

<sup>15</sup> Nomo Kwarén te nke mwanámp pourou mo námpan maok, wae nomo Kwaromp Tárápan nke námp te maomp Naropwar Kwaro kor, take pourourápono. Mao te Kwaromp Táráp, tá kápae kare ankank Kwaro yoroimpan kámákár akwap námpon. ☆ <sup>16</sup> Kwaro kápae kare ankank yámar mek yak námp, tá apárok yak námp yoroimp te, Tárápao kor énékér yoroi nepon. Mao te ankank ponankor nomo yi fek nke konámp, tá nomo nke mwanámp pourou monámp ankank, tá nkwakwe make kárákáre kor ensel fákáre, tá nkwakwe make kárákáre kor spirit, tá ponankor nkwakwe make kárákáre tokwaeráp ankank yoroi nepono. Mao am ankank ponankor yoroi nepara, am ankank ponankor te mao námokurápon. ☆ <sup>17</sup> Mao te ankank wokwaek kar yak mo fek manénkir yakrá, mao námokuráp kárákáre fek má kápae kare ankank má ponankor wokwaek kar forokareakámpan mao ankár yae-párák kare sámp-fákeyak nánko, kwapwe kare yakáp napon. ☆ <sup>18</sup> Mao te siosomp me koron. Sios te maomp pourounon. Mao te siosomp yiki yak fi kare támaonon. Mao te sumpwiaka am sumpwian kwe-pwarará maomékir fárámpeanámp aropara, amnámp kárákáre fek ankank ponankoran kor kámákár akwap námpon. ☆ <sup>19</sup> Kwaromp ninik te náráp ninik te ponankor Jisasén sánkea Kwaro námoku am mek

---

☆ **1:12-14:** Ef 1:18-19 ☆ **1:15:** Jo 1:18 ☆ **1:16:** Jo 1:3 ☆ **1:17:** Jo 1:1 ☆ **1:18:** Ef 1:22-23

top-pwarámpá yak naerianámpon. ☆ 20 Kwaromp ninik te náráp yámar mekamp ankank ponankor, tá apárokamp ankankan kor ponankor wokwaek te paneki yakápia napan, oukoumwan te am ankank tia mao námokunt ankárankamp ninik fek ankára mek tapokwapea pwar naerianámpon. Aeria námp kwamp, mao Kraisén yaopwae porokopramp fek sumpwiaerianánko, maomp yiri kwarákarea námp fek táman Kwaro nomp yopor ninik sámp-anámpá pap námpon. ☆

21 Wokwaek te yumo kwatae ninik fek panek yakáp napo, am kwatae ninik nap támao nánko, yumo Kwarén yopor-arop yakápiapono.

22 Aeapan maok, oukoumwan te Krais yaopwae porokopramp fek sumpwianánko, Kwaro yumwan am fek fwapokwapia éréképea yumwan námont ankárankamp ninik fek yakáp mwanapria ninámpon. Mao taki námp te, yumwan éréképá koropea námokuráp wonae fik párapok tenánko, yumo amwar kar yiki kukarrá yakápria, mao nke námp fek yumo kwatae niniki nap yak mo naenámpria ninámpon. ☆

23 Yumo wokwaek mérinap mér te ankár am fek táman kárákare fek yakáp kip. Yumwan kwekár ninik kwataerao éréképea akwap nánko, yumo yiráp Kwaromp Kwapwe Kare Kar wa napao, nánkár wakmwaek yámar mek yakáp mwanap ninik nap pwar mwanape. Ono Pol ono Kwaromp Kwapwe Kare Karamp tére arop yakria, maomp apár mekamp ponankor koumteouráp aropan yino am kar farákáp námpon. ☆

---

☆ 1:19: Kl 2:9 ☆ 1:20: Ef 2:3 ☆ 1:22: Ef 2:14-16 ☆ 1:23: Hi 6:11

*Polo Kolosi mekamp aropan yaewourimp kar*

<sup>24</sup> Oukoumwan te ono yumwan yaewourria touwe sámp nampán warákár nampon. Ono Krai-somp siosén yaewour nae namp te, Krai-somp pourouno. Kraiso siosén yaewour riaka sámpámp touwe tokwae te oukoumwan pwar mono. Am touwe onomp pourouk korop nánko, ono sámp naeria namp te, Kraiso sámpnámp touwe méntér pwianoria nampon. <sup>25</sup> Kwar námoku onan sios mek téreaerianánko, ono yumwan yaewour riaka farákápnamp kar máte Kwaromp karan ponankor farákápnamp. <sup>26</sup> Má kar máte wokwaek kápae kare ke fek te mek wouroumpeyakánko, ponankor arop farákápnamp te am kar mér moiapon. Aeno oukoumwan te Kwaromp ponankor koumteouráp aropao nke nap fek wae érik korop námpon. ✧ <sup>27</sup> Kwaro am táman náráp finoria nomwan yénképnámp te, nomo wae mér námpono. Má kar mek wouroumpá yakeakápnamp te kwapwe kare ara, arop ankwap fi ponankoran kor yaewour naenámpon. Mámá kar mek-wouroumpeyak námamp te arak naenámpon: Krai yumont yak námpara, mao yumwan éréképnápnamp pokeanánko, méntér yámar mek wae kwapwe fek yakápnamp mwanapan yépék napon. ✧ <sup>28</sup> Yino te ponankor ankákáránk aropan Krai-somp Kwapwe Kare Karan farákápnamp konámpon. Yino te kwapwe kare ninik ntia kwapwe kare méraok am farákápnamp yénkria, kárákáre kor kar farákápnamp námamp te, am farákápnamp kárákáre kor Kris-ten yakápnamp napo, yino am farákápnamp Kwaronápnamp éréképnápnamp tukupá párapok mwaria námpon. ✧ <sup>29</sup> Aeria

namp kwamp maok, ono ankár kárákáre fek térea wae namp te, Krais námoku onan kárákáre sáp námp fek nampon. ☆

## 2

*Polo Kolosi mekamp sioso Kwarén mér napan nínikimp kar*

<sup>1</sup> Onomp nínik te yumo ntia taun Leodisia mekamp arop, tá arop ponankor onan nkea mér mo napan kor, man yaewourrá térea wae namp aran mérenkria nampon. <sup>2</sup> Ono térea wae konamp te, am támao yumwan yaewouria, yiráp nínik mek kárákáre sánk nángo, nonopok nounourouprá wonae fik kari yakáp mwanapria ni konampon. Onomp nínik te, yumo kwapwe kare nínik sámpea napo maok, am támao yiráp mérnáp nínik kárákáre sánk naenámpria nampon. Onomp nínik te yumo ankár Kwaromp kar fi mek wouroumpeyak námp fwapi mérenkria nampon. Krais te námoku támao am mek wouroumpeyaknámp kar fi korono.

☆ <sup>3</sup> Kwaromp nkwakwe make nínik kwapwe ntia mér kápae kare te Kraisomp nínik mek yak námpara, stua mek kápae kare nkwakwe make ankank kwapwe kare top-pwarámpeyak námp niampon. ☆

<sup>4</sup> Onomp nínik te arop ankwapao yumwan kwekárá kar porokweantánoria namp kwamp, yumwan má kar má sér rae: ☆ <sup>5</sup> Ono te yumont yak moria panek yak nampao kor, yumwan nínik namp te wae ono kareao yumont yak namp

---

☆ **1:29:** 1 Ko 15:10 ☆ **2:2:** Ef 3:3-4 ☆ **2:3:** 1 Ko 1:30 ☆ **2:4:** Ro 16:18

niampara, yumo yae-párák téreria Kraisén mér kárakáre napan ono nkea warákár nampon.

*Nomo ankár Kraisént yakria yiki yak mwanámp kar*

<sup>6</sup> Yumo te wae Jisas Krais Tokwae sámp napara, ankár mént koumpea paokop kip. <sup>7</sup> Yumo ankár méntér koumpea kárakáre yakáp nap te, yaoao kwar mek arák mek karaok pikeyak nánko, yao kárakáre yak konámp niamp, tá nap oumpwar fek ti tenapo kárakáre yak konámpnám taknámpi yakáp kipo. Yumo ankár am Kwapwe Kare Kar yino yumwan yénkrá farákáp námp táman mér kárakáreria, kápae kare por ankár Kwarén 'Aesio'rá sér kipo. ☆

<sup>8</sup> Yumo te fwapnae karia mér kar kip: Takria arop ankwapao yumwan apárokamp méramp kar mwar sankoropea yumwan farákáp napo, am kar támao yumwan poupwekápia sámp-fákeyak naeane. Takrá paokopnap arop fákáre te Kraisomp karan farákáp mono, tékénou kar, tá yámar ntia apár poukeyak konámp spiritamp karan farákáp konapon.

<sup>9</sup> Yumo te wae mér napon: Krais te arop nomo niamp arákareanánko, Kwaromp kápae kare ninik ponankor te maomp pourou mek top-pwarámpá yak námpon. ☆ <sup>10</sup> Krais te ponankor ankank poukeyak konámp kárakáre tokwaeráp spiritamp yépe kor tokwae yak námpon. Yumo te Kraisént koumpá yakáp napara, Kwaro yumwan yiki yak sánk nánko, am yiki yak te yumwan top koupouri yak naenámpon. ☆ <sup>11</sup> Yumo ankár mént

---

☆ **2:7:** Ef 3:16-18    ☆ **2:9:** Jo 1:14,16    ☆ **2:10:** Ef 1:21-22

kari yakria yipi fárákapnap ninik am te pourou yipi fekamp mono. Yumo Kraisomp ninikaok tukupria, wokwaekamp ninikamp yae ankore mek yakáp mo nap, am te yipi fárákap kare támaono. ☆ 12 Yumo ént mek nér nap te, Kwaro Kraisént yumwan apár me mek kák námpria yénkép napon. Tá yumo Kwaromp kárákáreráo Kraisén apár me mekamp fárámpea papámpan mér napara, yumo kor ént meknámp forokor nap te, yumwan Kraisént apár me mekamp fápárámpea kák námpan yénkép námpon. ☆ 13 Yumo wokwaek te Juda mo ara, loaok tukup moria, nkwakwe make kwatae ninikaok paokop napo, am támao yumwan surumpwirá kák námp niamp námpon. Aenámpan maok, am ke fek táman Kwaro yumwan yaewour nánko, yumo Kraisént yiki yak sámp napo, Kwaro yiráp ninik kwatae am ponankor tirá épér námpon. ☆ 14 Nomp nkwakwe make ninik kwatae námp, tá maomp loao nomwan sámp-fákeyak námpan kumwi tari nap te, am ponankor warko Kwaro námoku yaopwae porokopramp fek pukupia ponankor torokoria pwate námpon. ☆ 15 Mao te yaopwae porokopramp fek kápae kare yao-pwaeráp kwataeramp kárákáre tokwae ponankor tirá épéri pwate námpan, arop nke nap fek am fárákap te kárákáre mo, kánanke kwataenorá yénkép námpon. ☆

*‘Nomo wae Kraisént sumpwi námpara, nkwakwe make lo te nomwan yaewour mono’rá sénámp kar*

---

☆ 2:11: Ro 2:28-29    ☆ 2:12: Ro 6:4-5    ☆ 2:13: Ef 2:1,4-5

☆ 2:14: Ef 2:14-16    ☆ 2:15: Kl 1:13

16 Aenámpara, arop ankwapao yumwan fir fári konap lo, ént fári konap lo, yopwar méntép koupoukour konap yae, yunk méntép, tá sabat yae méntép koupoukour konap táman yumwan mántwaok mwanapria sénapo, táman woupwi pap kwapono. ☆ 17 Am lo karaok térerá tukupnap ke te youpoukwap yak mono, wakmwaek korop naenámp ankankan wounáp námpon. Aeno Kraiso maok ankár kare kar ankankono. ☆ 18 Táte arop ankwap yumwan yémén nkenámp ankankan farákápria, ‘Yumoku te wampwe pwarará, ensel fákáreran lotuenk’rá sénánko te, yumo mao numwar yumwan apárok sámp-anámpdoria yénképá yakápi kwapono. Take pourouráp arop te wokwaekamp ninikaok yarak námpao maok, námoku te mér kwapwerápao namp ritea námpon. ☆ 19 Aenámpao maok, mao te nomp yépe kor kare Kraisén te warko sámp-fákeyak mo, pwar námpon. Am yépe kor te nomp pourouan fir nénk nánko, am támao ke mekmwaek, arák mekmwaek ankank pourouk yae-párák nonopok toukouri yak konámpon. Aenángo maok, pourou Kwaro ninik námpaok akwapea tokwae kari yak konámpon. ☆

20 Yumo te waeman Kraisént sumpwi napo, yámar ntia apár taokeyak konap spirit yumwan warko sámp-fákeyak mo nap te, apaerá yumo warko apárokamp aropamp paokop níamp napon? Apaeritea yumo warko nkwakwe make loaok paokopria, 21 nkwakwe make ankank kákánkrá wurirá paokop napon? ☆ 22 Take pourouráp

---

☆ 2:16: Ro 14:1-12 ☆ 2:17: Hi 10:1 ☆ 2:18: 1 Ko 4:6 ☆ 2:19: Ef 4:15-16 ☆ 2:21: Ga 4:3-5,9

lo te nomo yae fek yoronámp ankankan sérar námpara, koupour kar tomore konámpono. Am lo te arop fárákapao saráp papea napan, nomwan ampaokenkria yénk i konapon. ☆ <sup>23</sup> Tá kare, am take pourouráp lo te námwan, námoku te wampwe pwarará, enselén loturá, nomp pourouan fop-waoka wae námpon. Aenánko, arop ankwap fárákapamp ninik te, am lo te kwapwe kare ninik ntia yonkwae kourwaok akwap námpan mpwe napon. Aenapan maok, am lo te nomwan yae-wour nánko, nomo nomp pouroukamp nkwakwe make ninikan kwe-pwar mwanámp pourou mono.

### 3

#### *Kwaro nomwan Jisasént fárámpá papámp kar*

<sup>1</sup> Kwaro yumwan waeman Kraisént fápárampea kák námpara, yumo te ankár narekamp ankankan saráp térerá sámp kipo. Am narekamp némpouk te Kraiso Kwaromp yae-párak mwaek náráp sia king fek tank námpon. ☆ <sup>2</sup> Yumo te ankár kápae kare por narekamp ankankan saráp ninik kip. Apárokamp ankankan te niniki kwapon. ☆ <sup>3</sup> Yumo te sumpwi tenap niampria, Kwaromp wonae fik yakáp napo, Jisasomp pourou yumwan nánkárápá yak námpon. ☆ <sup>4</sup> Krais te yiráp yiki yakáp mwanap fi támao ara, nánkár wakmwaek érik korop nánko, yumo kor mént érik Kwaromp wae kwapwent korop mwanapon. ☆

#### *Nomo wourékam arop yakápnámp kar*

---

☆ **2:22:** 1 Ko 6:13    ☆ **3:1:** Mk 16:19    ☆ **3:2:** Mt 6:33    ☆ **3:3:** Ro 6:6-7; 2 Ko 5:17    ☆ **3:4:** 1 Jo 3:2

<sup>5</sup> Aenámpara, yumo te má apár mekamp kwatae ninik yiráp ninik mek yak námp ankár tirá wour kipo. Ono sénamp te ará ninikan sénampon: Kokopor i konap ninik, ounnámp ninik, tá yi fek nkea ninik mek saráp kwatae ninik i konap ninik, tá ankár kwataenámp ankankan saráp ninik kárákáre konap, tá arop ankwapamp ankankan nkea kikiank i konap ninik. Am kikiank i konap ninik am te kwekár kwarén lotunap niamp ninikono. ☆ <sup>6</sup> Am taknap arop fákáre Kwaromp karwaok tukup mo i konapara, nánkár Kwaro am arop fákáre ponankoran touwe kwatae nénk nanampria nánapi tenámpon. ☆ <sup>7</sup> Wokwaek te yumo kor am takap arop fákárerént paokopria ponankor am ninik takiapon.

<sup>8</sup> Aeapan maok, yumo oukoumwan te ankár ponankor tirá épér kipo. Am tirá épér mwanap ninik te ará: Yonkwae pwarámprá yopor i konap ninik, tá arop ankwapan kokwarokria, apae fek sámp-wouroump naerá ninik i konap ninik. Wouroumprá ounnámp kar sér i konap ninik te yiráp táp meknámp kánanke oukur naeane. <sup>9</sup> Yumo te yiráp ankwapyaenápen kwekári kwapono. Am te apae riteanápe, yumo manénkir sámpea paokopinap ninik kwatae wae pwarará, <sup>10</sup> Kraisomp wourékam ninik fek paokop napono. Kwaro yumwan wourékam arop yoroi papria, mér kwapwe nénkria, yumwan yaewour nánko, maomp ninik niampi yakáp napono. ☆ <sup>11</sup> Aenámpara, nomo am wourékam yoronámp arop te nomo ponankor waeman ankárankamp

pourouráp yakáp námpon. Aenámpara, nomo warko arakrá ninik mwareano: Nomo te mwar Grik fi, tá mwar Juda fi, yipi fárákap konap, yipi fárákap mo i konap, moumountukri kar, tá nkwakwe make fi arop, ankwapamp tére konap arop, amwar yaknám aropono. Am te apae riteanápe, Kraiso saráp yakria, mao námoku ponankor nomo ou mek yak námpono.

*Nomo ankár aropomp i konap ninikan sámp mwanám kar*

<sup>12</sup> Kwaro yumwan yonkwae touwea waeria nárápria nánkárápeanánko, yumo te Kwaromp arop fi yakáp napara, yumo kor ankár take pourouráp ninik sámpeaka arak kip: Yumo ankár arop ponankor yonkwae touweriaka fwapnae karia yaewour kip. Yumokunap ninik te ankár apárok sámp-anámprá, arop sánánkar porokwe fekria maok, yumwan nkwak mak napo kor, koupour nopok mwaria yonkwae pwarámp kwapono. ☆ <sup>13</sup> Yumo ou mek nonopok kar séri tenap yak nángo te, yonkwae porokwe fekria am ninik nik mo, pwar kip. Kwar Tokwaerao yiráp kwatae ninik tirá épéri námpara, yumo kor tak kip. ☆ <sup>14</sup> Arop yonkwae touwe konap ninik te ponankor kwapwe kare ninikan kámákár akwapria, am kwapwe kare niniként tapokwapea, énéni tére konámpon. Ae konámpara, yumo ankár arop ankwapan yonkwae touwe kipo. ☆ <sup>15</sup> Krais te nomwan yonkwae porokwe sáp konámpara, kwatae ninik yak nángo, am yonkwae porokwe yak mo i konámpon. Tá ninik kwapwe fek yakáp

napo te, am yonkwae porokwe ninik támao yak námpon. Kwaro yumwan wumwiria érékép námp te, yumo wae am yonkwae porokwe fek ankárankamp pourou niamp, ankárankamp ninik fek yakáp napon. Tá yumo ankár Kwarén aesiorá saráp yakáp kip. ☆ 16 Kraisomp kar te ankár yiráp ninik mek kárákáre yak nánko maok, yumo nonopok kar farákápria maok, nkwakwe make kar kwapwe mér mwanapan saráp farákáp kip. Aeria maok, yumo ankár Kwarén ‘Aesio’rá séria maok, tár kar Kwaromp Buk fekamp sámpriaka, lotu i konap tár karan kor sámpá paokopria maok, yiráp waemp kárákáre naenámp tár karan sámp kip. ☆ 17 Yumo ankank ponankor tére mwaria nap, tá kápae kare ankank sérar nap ponankor te Jisas Tokwae Karao ninik námpaok tére kipo. Aeria maok, mao yumwan yaewour námpan ninikia Naropwar Kwarén ‘Aesio’rá sér kip. ☆

*Kristen yakápnap fiouan sénámp kar*

18 Koumteou yumo te yiráp poumaropao sénap karwaok paokop nap te, Kwaro nke námp fek yae-párák kare ninik napon. ☆ 19 Poumou-tárápu yumo kor ankár yiráp koumteouran yonkwae touweria maok, am fárákapan kar tokwae fek séri kwaponono. ☆ 20 Tárápu yumo te ankár yiráp éntupwar naropwaro sénap karwaok paokop kip. Am te Kwar Tokwaerao takenkrianámp ninikono. ☆ 21 Naropwaryaenáp, yumo kor yiráp tárápuran youpoukwap yopor saráp yakápi kwaponono. Tak

---

☆ 3:15: Jo 14:27 ☆ 3:16: Ef 5:19 ☆ 3:17: Ef 5:20 ☆ 3:18: 1 Pi 3:1-2 ☆ 3:19: 1 Pi 3:7 ☆ 3:20: Ef 6:1-3

napo, yiráp tárápu kokwaeria yumwan warákár mo mwanape. ☆

*Taokeyakáp konap arop ntia tére aropan sénámp kar*

<sup>22</sup> Tére konap arop yumo te yumwan taokeyak konámp aropao sénánko te, ankár mántwaok tére kip. Yumo mao warákáranoria mao nke námp fek saráp tére mwanape. Yumo ankár Kwar Tokwaeran apápria maok, kwapwe kare tére mwana-pan saráp ninik kipo. <sup>23</sup> Apae kápae kare ankank yumo tére nap te fwapnae karia kárakáre fek tére kipo. Yumo aropamp téreran tére napanápe, yiráp Kwar Tokwaeramp téreran tére napon. <sup>24</sup> Yumo takria maok, mérenke: Krai te yumwan taokeyak konámp Arop Tokwae ara, yumo maomp tére nap fek te nánkár wakmwaek maomp firáp arop ponankoran nopok nénk nanampria nánapitenámp ankank yak námpon. <sup>25</sup> Tá kwatae ninikinámp arop te nánkár námoku ami námp fek touwe kwatae sámp naenámpon. Kwar te ankárankamp puri fek arop ponankoran yurukup i konámpon. ☆

## 4

<sup>1</sup> Arop taokeyak konap arop yumo kor ankár yiráp tére aropan kwapwe kare yae-párak kare ninik fek kipo. Yumo te wae mér napon, yumwan taokeyak konámp Kwar Tokwaerao kor yámar mek yak námpon.

*Kwarén kar toropwapria yae-párak kare paokop mwanámp kar*

<sup>2</sup> Yumo te ankár kar toropwap i konap niníkan kárakáre fek sámpá paokopria maok, am kar toropwapnap ninik te fwapnae karia ninik kouria Kwarén 'Aesio'rá sér kip. ☆ <sup>3</sup> Yumo ankár Kwarén sénapo, yinan kor kar farákáp mwanámp mwae kup kik-pwarano. Mámá kar te wokwaek mek wouroumpeyakámpan oukounwan te wae érik korop námpón. Aenámpan maok, arop farákáp am kar wa te monoria nap kwamp, onan fákapá páte naponó. ☆ <sup>4</sup> Yumo ankár Kwarén sénapo, ono Kwaro onan, takrá kar farákápaerianámp ninik fek mámá mek wouroumpeyaknámp kar érik farákár nanampon. ☆

<sup>5</sup> Yumo te arop ankwap farákáp oukounwan Kristen mo nap nke nap fek te yiráp paokop fwapia ninik kour fek paokop kipo. Yumo ankwapan yaewour mwanap ke kwaporok pwar mwanape. ☆ <sup>6</sup> Yiráp kar te ankár kwapwe kare nánko, arop wa mwar karrá woupwi pap mwanap karan saráp sérar kipo. Yumo ankár arop ponankoran fwapia ninik kouria yae-párak kare karan pwarokwaprá sér mwanapon. ☆

*Polo Tikikus ntia Onesimusén Kolosi mek tirá kérépnámp kar*

<sup>7</sup> Tikikus te Kwar Tokwaeramp tére pwar mono, ankár kwapwe kare tére konámp aropono. Mao te nomo énéni tére konámp támaonon. Aenámpantá ono man warákár tokwae nampono. Mao te ono tére namp yumwan sénaenámpóno. ☆ <sup>8</sup> Ono yumonapok man sámp-kérép namp te, yino te

---

☆ **4:2:** Ef 6:18    ☆ **4:3:** Ef 6:19    ☆ **4:4:** Ef 6:20    ☆ **4:5:** 1 Te 4:11-12    ☆ **4:6:** Ef 4:29; 1 Pi 3:15-16    ☆ **4:7:** Ef 6:21

mokoprá yakáp námpaoeanrá yumwan farákáprá sénánko, yumo wa napo, am támao yiráp waempén kárákáre sánk nánko, warákár mwanapon. ☆

<sup>9</sup> Onesimus te tére kwapwe konámpantá ono man warákárampono. Mao te nomp ankwapnápara, ono man Tikikusént akwapenkria sámp-kérép nanko, akwap nep te, yumwan mapek koropánknámp ankank ponankor farákáp nenepón. ☆

*Polo Kolosi firan ‘Gude’ rimp kar*

<sup>10</sup> Aristarkus te yinan fákapea páte napo yak nempao, mao kor yumwan ‘Gude’rá sénámpon. Tá Barnabasomp naompnáp Mak, mao kuri yumwan ‘Gude’rá sénámpon. Mao yumonapok akwap nánko te, ono wae manénkir yumwan sériampnámp taknámp, yumo man warámp kipo. <sup>11</sup> Tá Jisas, ankwap e te Jastus, mao kor yumwan ‘Gude’rá námpon. Juda fi meknámp te, am yinínkaopwe támao mwar Kristenia, onan yaewour kwapwerá téreria arop Kwaromp firáp yakápenkria kar farákáp námpon. ☆ <sup>12</sup> Epafras kor yumwan ‘Gude’rá sénámpon. Mao te Kraís Jisasomp térenámp arop, yiráp nouroup támao ara, ankár Kwaro yumwan yaewouranoria arakrá kar toropwap saráp yak konámpon: ‘Yumo ankár kárákáre fek fokopeyakria, yumo ankár arop méri yakáp konapnámp araknámpi yakria maok, Kwaromp kar te kare karonoria mér kárákáreria, yumo ankár Kwaro takenkria warákárnámp ninikaok saráp yakáp mwanapon’rá sér i konámpon. <sup>13</sup> Ono man te waeman mér

namp kwamp yumwan sér rae: Mao te térea waenámpara, yumwan yaewouria maok, tá Leodisia ntia Hierapolis mekamp aropan kor mént yaewour námpon. <sup>14</sup> Luk te nomp dokta kwapwe kare nomo man warákár konámpara, mao ntia Demas yumwan kor ‘Gude’rá nepon. ☆

<sup>15</sup> Yumo ono ‘Gude’rá namp máamá Leodisia mekamp nouroup fákáreran séria maok, Nimfa ntia sios arop maomp nap mek koupoukour konapan méntér onomp ‘Gude’ má sér kipo. <sup>16</sup> Yumwan sánknamp pas má nkea fákeyakrá warko Leodisia mekamp siosén sánk kip. Tá Leodisia mekamp siosén sámp-kérépnamp pasan nopok kor nkeaka yumwan sánk mwanapon. <sup>17</sup> Yumo Arkipusén arakrá sér kip: ‘Amo Kwar Tokwaeramp tére sámpea tére nap am pwar kwapon. Ankár fwapnae karia taokeyakrá fwapi téreamp’rá sér kipo.

<sup>18</sup> Ono Pol onokump yae fek yumwan ‘Gude’rá sénamp kar má kumwi nampono. Yumo te ankár ono kalabus mek yak nampan onan ninik kipo. Ono ninik namp te, Kwaro námokuráp ninik fek yumwan yaewouria yumont yakanoria nampon.

**Kwaromp Kwapwe Kare Kar**  
**The New Testament in the Karkar-Yuri Language of**  
**Papua New Guinea**  
**Nupela Testamen long tokples Karkar-Yuri long**  
**Niugini**

Copyright © Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 11 Nov 2022 from source files dated 9 Oct 2020

7103f8db-88c2-5fec-8ac4-0edfac04e885